

<><><><><><>

Headlines

1. केन्द्रीय गृहमंत्री अमित शाह होरें आखेआ जे जम्मू कश्मीर दा राज्य दा दर्जा कीते गेदे वायदे मूजब पक्क गै ब्हाल करी दित्ता जाग।
2. कठुआ जिले च छप्पे दे आतंकवादिएं गी फगड़ने लेई जारी तपाशी अभियान दे दायरे गी होर नमें इलाकें तोड़ी बधाई दित्ता गेआ ऐ।
3. मुख्यमंत्री उमर अब्दुल्ला ते उपमुख्यमंत्री सुरिन्दर चौधरी होरें शहीद होए दे चौथे पुलसकमी दे जम्मू च लोआए गेदे श्रद्धांजलि कार्यक्रम च हिस्सा लैता।
4. 9 दिनें दे नरातें दा पवित्र ध्यार कल्ला थमां शुरू होआ'रदा ऐ, एह्दे लेई सुरक्षा दे पुख्ता बंदोबस्त ते लोचदे सबै प्रबंध करी लैते गेदे न।

<><><><><><>

केन्द्रीय गृह मंत्री अमित शाह होरें आखेआ ऐ जे जम्मू-कश्मीर दा राज्य दा दर्जा, पैहले कीते गेदे वायदे मूजब पक्क गै ब्हाल करी दित्ता जाहग। इस सरबंघै च कोई समें-सीमा दा जिक्र कीते बिजन श्री शाह होरें आखेआ जे पिच्छले ब'रे जम्मू-कश्मीर च असैम्बली दे चुनांS पूरी रमानदारी कन्नै करोआए गे। टाईम्स नॉउ सम्मिट 2025 च अपने विचार सांझे करदे होई गृह मंत्री होरें आखेआ

..... बाईट

ध्यानजोग ऐ जे 2019 च जिसलै दफा 370 हटाई गेई ही ते पैहलकी जम्मू-कश्मीर रिआसत गी द'ऊं केन्द्र शासित प्रदेशें च तकसीम कीता गेआ हा, उसलै संसद च अपने भाषणै दरान गृह मंत्री होरें आखेआ जे उचित समें औने पर जम्मू-कश्मीर दा राज्य दा दर्जा पक्क गै ब्हाल करी दित्ता जाहग।

<><><><><><>

Kathua Search

सुरक्षा बलें कठुआ जिले च जारी तपाशी अभियान दे दायरे गी अज्ज होर नमें इलाकें तोड़ी बधाई दित्ता ऐ। की जे जिले दे दूर दरेड़े जंगली इलाकें थाहर टाकरे आली थहरे कश चौथे पुलसकर्मी दा शव ते 2 मारे गेदे आतंकवादिएं लोथां बरामद कीतियां गेइयां न। आकाशवाणी दे जम्मू संवाददाता नै जानकारी दित्ती ऐ जे हैडकांस्टेबल जगवीर सिंह हुंदा शव राजबाग दे घाटी जुथाना दे जंगले थमां बरामद कीता गेआ ते जम्मू आंदा गेआ, जित्थें पुलस मुख्यालय दे कश गुलशन ग्राउंड च उनेंगी श्रद्धांजलि दित्ती गेई। प्रतिबंधित जैशे मोहम्मद

गुट कन्नै जुड़े दे दऊं आतंकवादी जिनेंगी मन्नेआ जा'रदा ऐ जे पाकिस्तान दे बसनीक उंदिएं लोथें कन्नै किश थेआर ते जंगी समेयान बी बरामद कीता गेआ ऐ। इस इलाके च एह टाकरा वीरवारें बडलै शुरू होआ हा ते शुक्रवार बी दिन भर जारी रेआ। टाकरे दरान 4 पुलसकर्मी शहीद होए न ते हाल च गै घुसपैठ करियै इस भक्खी आए दे दऊं आतंकवादिएं गी मारी मकाया, जिसलै के आतंकवादी समूह दे होरनें सदस्ये दी तलाश अज्ज त्रीए रोज बी जारी ऐ।

<><><><><><>

मुख्यमंत्री ओमर अब्दुल्ला होरें कठुआ जिले च पाकिस्तानी आतंकवादिएं कन्नै छिड़े दे टाक्करे दरान शहीद होए दे 4 पुलसकर्मीएं चा इक दे अज्ज जम्मू च लोआए गेदे श्रद्धांजलि समारोह च हिस्सा लैता। गुलशन ग्राउंड जम्मू च स्थित पुलस हैडक्वार्टर च साफीयान पुलस चौकी दे प्रभारी ते हैडकांस्टेबल जगबीर सिंह हुंदे श्रद्धांजलि कार्यक्रमै दी अगुवाई मुख्यमंत्री ओमर अब्दुल्ला होरें कीती। इस मौके उपपर उपमुख्यमंत्री सुरिंदर चौधरी, मंत्री सतीश शर्मा, जम्मू-कश्मीर पुलसा दे डरैक्टर जनरल नलिन प्रभात ते पुलस ते सिविल प्रशासन दे बड्डे अधिकारिएं सने फौज, सीआरपीएफ ते बीएसएफ दे ऐहलकार बी मजूद हे जि'नें शहीद पुलसकर्मी गी श्रद्धांजलि अर्पित कीती। इस मौके उपपर मीडिया कन्नै गल्लबात करदे होई उपमुख्यमंत्री सुरिंदर चौधरी होरें आखेआ तोआई कठुआ टाक्करे च शहीद होए दे रियासी जिले दे सलैक्शन ग्रेड कांस्टेबल तारिक अहमद हुंदा खीरी संस्कार अज्ज पूरे सम्मान कन्नै कटरा दे नेड़े उंदे जद्दी ग्रांड चम्बा च कीता गेआ। तारिक अहमद होरें कठुआ जिले च टाक्करे दरान कल देसै लेई सर्वोच्च बलिदान दित्ता हा। उंदे खीरी संस्कार च सांसद जुगल किशोर शर्मा, श्री माता वैष्णो देवी हलके थमां विधायक बलदेव राज शर्मा, उधमपुर-रियासी रेंज दे डीआईजी रईस मोहम्मद भट्ट ते होर दुए वरिष्ठ अधिकारिएं, साथिएं ते परोआर दे सदस्ये हिस्सा लैता। इस मौके पर सांसद जुगल किशोर शर्मा होरें गलाया

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम "मन की बात" च इस बारी 30 मार्च कल गी देश विदेश च रौहने आले श्रोताएं कन्नै बचार सांझे करगन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किश्त होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>

Navratra

9 दिनों दे नराते दा पवित्र ध्यार कल्लै थमां धार्मिक जोश कन्नै रंभ होआ'रदा ऐ। एहदे लेई सब्बै लोड़चदे प्रबंध ते सुरक्षा दे निगगर बंदोबस्त करी लैते गेदे न। मेद कीती जा'रदी ऐ जे इनें 9 दिनें दरान च बावे आली माता ते कोल कंडोली माता दे मंदरें सनें, मंदरें दे शैहर जम्मू च सब्बने प्रमुख मंदरें च भक्ते दी खरी मती भीड़ दिक्खने गी लब्भोग। एहदे अलावा श्री माता वैष्णो देवी हुंदी पवित्र गुफा च मत्था टेकने लेई भक्ते आस्तै शांतिपूर्ण ते यात्रा जमीनी बनाने लेई सब्बै लोड़चदे बंदोबस्त करी लैते गेदे न। एहदे अलावा यात्रा दे आधार शिविर कटड़ा च बी सुरक्षा दे पुख्ता बंदोबस्त कीते गेदे न।

<><><><><><>

Ramban Security (byte)

कल्लै थमां शुरु होआ करदे चैत्तर नराते ते कन्नै ईद दे ध्यार दे मददेनजर रामबन जिले च सुरक्षा बंदोबस्त निगगर करी दित्ते गे न। ध्यानजोग ऐ जे कठुआ जिले च मुश्तबा पाकिस्तानी आतंकवादिएं कन्नै जारी टाक्करे दे बाद सुरक्षा सरबंधी हीलें होर बी मते जरूरी होई गेदे न। ईद—उल—फितर दे ध्यार ते चैत्तर नराते दे पर्व लेई कीते गेदे सुरक्षा बंदोबस्तें बारै गल्ल करदे होई रामबन दे एसएसपी कुलबीर सिंह होरें गलाया जे कल्लै थमां नराते दा पर्व शुरु होआ करदा ऐ ते कन्नै ईद दा ध्यार बी मनाया जाहग जेहदे मददेनजर एहतियातन सुरक्षा बंदोबस्त निगगर करी दित्ते गे न। उ'नें आखेआ

<><><><><><>

JMC

लोकें आस्सेआ पुट्टी गेदी मंग दे परते च जम्मू नगर निगम दे कमीशनर डॉ. देवांश यादव होरें अज्ज डोगरा हाल आले कांजी हाउस दा दौरा लाया ते एहदे गेट गी शिफ्ट करने बारे संभावना दा आंकलन कीता। इस दोरे दा मकसद मकामी बसनीके आस्सेआ पूट्टी गेदी चिंताएं गी दूर करियै इंदा नबेड़ा करना हा।

<><><><><><>

JMC Eid

औंदे ईद दे ध्यार गी दिखदे होई जम्मू म्युनिसिपल कमीशनर नै लोकें लेई साफ सुथरे मटन दी उपलब्ध जकीनी बनाने लेई इक अभियान रंभेआ ऐ। जेएमसी कमीशनर डॉ. देवांश यादव हुंदे दिशा निर्देश पर शैहर च मीट—मटन आले हट्टिएं पर चानचक्क दौरा लाया गेआ। मटन दी 11 हट्टिएं गी खाद्य सुरक्षा मानकें दी खलाफवर्जी करने लेई जुर्माना लाया गेआ। इस पैहलमकदमी दा मकसद ईद दे ध्यार गी शैल ढंगै कन्नै बिजन कुयै चिंता दे मनाना जकीनी बनाना ऐ ते कन्नै गै लोकें आस्सेआ कीती गेदी शकैते पर पुच्छ—गिच्छ करना बी ऐ।

<><><><><><>

करसानें गी बाअख्तिर बनाने ते राई—बाई पैदावार गी बढावा देने लेई सरकार आसेआ हर मुमकन मदाद उपलब्ध करोआई जा'रदी ऐ। सरकार दिएं बक्ख—बक्ख योजनाएं दे राहें करसानें गी लोड़चदे संसाधन उपलब्ध होआ'रदे न। एह्दी इक बड्डी मिसाल उधमपुर जिले दे थलोरा ग्रां च अम्बें दा इक बाग ऐ जेह्दी शुरुआत छड़े 100 दरख्तें कन्नै कीती गेई ही ते हून इ'दी गिनतरी 235 तगर पुज्जी गेदी ऐ। जिला बागवानी विभाग आसेआ सरबंघत करसान गी एह्दे लेई हर मुमकन स्हूलत दस्तयाब करोआई जा'रदी ऐ ते मेद ऐ जे इस रूतै दरान बी अम्बें दी बम्पर पैदावार कीती जाई सकोग। आकाशवाणी दे उधमपुर जिला संवाददाता नै सरबंघत करसानें कन्नै खास गल्लबात कीती। उ'नें आखेआ

<><><><><><>

